

101 年全國語文競賽原住民族語朗讀國小學生組(賽考列克泰雅語) 編號 1 號

spyang blaq balay na rangi' maku'

kyalun saku' ni yaba' yaya' maku' mha, “ laqi'! rasun su' myan mqwas biru' hugal lki! ” mha. ini' saku' sawya' balay musa' mqwas biru' hugal. ana ga, phswa' saku' lpi? ungat qbaqan maku'. siki mung saku' kay' na yaba' yaya'. nanu' yasa musa' saku' mqwas biru' hugal pqwasan biru' la.

minqwas saku' biru' rgyax sraral uzi ha. pzyux qu rnrangi' maku' cyux maki' tay kya. ana ga, ini' ptnaq balay pqwasan biru' rgyax ki pqwasan biru' hugal hiya'. pqwasan biru' rgyax hiya' ga, yasa qalang ta' nanak sa hya'. ta qu kwara' ppcbaq biru', ini' ga, glgluw na mqwas biru' ga, wiway Tayal kwara' uzi. pzyux qu pintnaqan ta' maki' kya hiya'. maki' ta' rgyax ga, iyat nanak mqwas biru', mnaw', myugi', hmyapas. cingay qu pqbaq ta' gaga' na Tayal. mqbaq ta' kay' Tayal. ini' ga, tminun, mqwas, tlubuw. kwara' zywwaw qani ga, pqasun balay.

ana ga, aring sa nyux saku' maki' pqwasan biru' hugal lga, yan wal mskawngat kwara' qu zywwaw na inaki' maku' sa pqwasan biru' rgyax la. yan wal si tbah m'uyut qu hngyang na qalang ta'. misu qani lga, yasa si wiway mqbaq biru'. yan nyux sqhuk zik na ngasal krnyax. ini' kbaq lmawsay mnaw' tay tanux uzi. mawyay balay mqwas biru' la.

maki' qutux qu spyang blaq balay na rangi' maku'. Wagi' Yumin lalu'

nya'. hiya' ga, Tayal uzi. qthuy ru wagiq balay. cyux mqwas biru' hugal. tayhuk sa hngawan na ryax lga, mutu musa' rgyax kwara' qutux ngasal nha'. musa' mita' qalang nha'. musa' rihay kyukay uzi.

minnxal, ryax na smqas sami kurisimas qu kyukay. mwah mzyugi' qu Wagi' Yumin. si lat lat ru tawput tawput mha myugi'. szyuy' nya' hwinuk nya' uzi. yan na kpayray tlhbaw mlaka' myugi'. mqas mita' kwara' qu tayal. mnxal lawzi. musa' saku' mcisal ngasal nya'. mthaylaw balay qu Wagi' Yumin. qngzyat mtzywaw ru rmaw snr'zyut ngasal. ana kmagaw, qmwax pyatu', mahuq lukus, phapuy. ini' ksa “ is ” ana qutux. blaq balay inlungan nya' uzi. baq gmalu' ssquliq. ru mung kay' na yaba' yaya' nya'.

ana yan na qthuy cikay qu rangi' maku' Wagi' Yumin qani. ana yan na ini' kbaytunux ktan uzi. aw' ga, kinmtasaw ru kinmshzywan qu inlungan nya' hiya'. ini' yungi' gaga' na Tayal. kya sinnhyan nya'uzi. mthaylaw ru gmalu' sa ssquliq. nanu' yasa mqas saku' rangi' maku' hiya'. pslungaw maku' hya'. kuna saku' mblaq uzi.